



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

იოანე სკილიცე

იოანე სკილიცე (Iōannēs Skylitzēs), XI ს. ბიზანტიელი ქრონისტი, მეტსახელად „თრაკესიელი“. დაწერილი აქვს „ისტორიული მიმოხილვა“ 811-1079 ამბებისა. თხზულების ძირითადი ნაწილი (811-1059) შესულია გიორგი კედრენეს ისტორიულ მიმოხილვაში (ი. ს-ს შრომის სრული ბერძნ. ტექსტი ჯერ გამოვლენილი არ არის), ხოლო 1059-79 ისტორია ცალკეა დაბეჭდილი და კედრენეს შრომას ბოლოში დაერთვის. ი. ს-მ თავისი თხზულება დაგეგმა როგორც თეოფანე ჟამთააღმწერლის „ქრონოგრაფიის“ გაგრძელება, რ-იც 811-ით ამთავრებს ამბების თხრობას. 811-იდან 944-მდე ი. ს. სარგებლობს ე. წ. „თეოფანეს გამგრძელებლებით“, ხოლო 944 შემდგომი ამბები აღწერილი აქვს უპირატესად იმ პირველწყაროების მიხედვით, რ-ებიც ჩვენამდე მოღწეული არაა, ამიტომაც ი. ს-ს თხზულების ამ მონაკვეთს განსაკუთრებული მნიშვნელობა ენიჭება. კონკრეტულად ჩვენთვის საინტერესოა კედრენე-სკილიცეს შრომის ის ადგილი, სადაც მოთხრობილია ნიკიფორე ქსიფიასის და ნიკიფორე ფოკას ძის აჯანყების ამბავი, მეფე გიორგი I-ის კავშირის შესახებ აჯანყებულებთან.

წყარო: გეორგიკა. ბიზანტიელი მწერლების ცნობები საქართველოს შესახებ, ს. ყაუხჩიშვილის გამოც., ტ. 5, თბ., 1963.

ლიტ.: ყ ა უ ხ ჩ ი შ ვ ი ლ ი ს., ბერძნული ლიტერატურის ისტორია, ტ. 3, თბ., 1973.

ლ. მანიავა
